



Sud Bosne i Hercegovine
Суд Босне и Херцеговине

Broj: S1 3 P 038022 20 Iž
Sarajevo, 23.10.2020. godine

Sud Bosne i Hercegovine, u drugostepenom vijeću sastavljenom od sudija Srete Crnjaka kao predsjednika vijeća, Vesne Trifunović i Dinke Bešlagić Čovrk, kao članova vijeća, odlučujući o žalbi Šutić Zdenka, Zubonja Vedrana i Tikvić Dragana koji borave u R Hrvatskoj, 23211 Vrana Pakoštani Pećina 8, koji osporavaju odluku Centralne izborne komisije BiH broj 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan BiH za Lokalne izbore 2020. godine, u nejavnoj sjednici, održanoj dana 23.10.2020. godine, donio je

R J E Š E N J E

Žalba se odbija.

O b r a z l o ž e n j e

Centralna izborna komisija Bosne i Hercegovine je Odlukom broj i datum navedeni u uvodu odbila upis u izvod iz Centralnog biračkog spiska za glasanja izvan BiH za Lokalne izbore 2020. godine po podnesenim prijavama do 01.09.2020.godine jer nisu ispunjeni uslovi propisani članom 3.15. stav 1, 2 i 3 Izbornog zakona BiH.

Navedenom odlukom odbijena je prijava Šutić Zdenka, Zubonja Vedrana i Tikvić Dragana, koji su blagovremeno izjavili žalbu u kojoj navode da im je prijava odbijena jer je utvrđeno da je na njihovoj adresi prijavljeno više od 6 osoba koje glasaju putem pošte. Ističu da na navedenoj adresi borave kao podstanari i da su oni radne kolega. Dodaju kako su na izborima 2018. godine uredno glasali.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena jer je izjavljena od neovlaštenog lica ili odbije kao neosnovana jer je osporavana odluka opravdano donesena kako bi spriječilo negativne posljedice koje bi eventualno nastupile dostavljanem glasačkog materijala za više lica na istu adresu. Odredbe člana 5.21 stav 1 Izbornog zakona BiH propisale su da Centralna izborna komisija utvrđuje način i proceduru glasanja građana BiH poštom pa je preispitujući žaliteljevu prijavu utvrdila da je prijava žalitelja sa adrese na kojoj je prijavljeno 6 ili više lica i da se radi o izbornom inženjeringu koji može uticati na izborni rezultat.

Ispitujući pobijanu odluku u okviru žalbenih navoda vijeće Apelacionog odjeljenja Suda Bosne i Hercegovine je zaključilo da je žalba dopuštena ali neosnovana.

Ovo vijeće je najprije utvrdilo da je žalba dopuštena jer je izjavljena sa mail adrese koju su žalitelji naveli kao svoju mail adresu u Obrascu prijave za glasanje izvan BiH. Pri tome, predmetna žalba je potpisana od strane žalitelja.

Prilikom utvrđivanja činjeničnog stanja Centralna izborna komisija BiH je, prema stanju u spisu, pravilno utvrdila da je označena adresa za prijem glasačkog materijala na prijavi, ista kako za žalitelje tako i za druga lica sa istom biračkom opcijom za sve prijave. Iz izvoda iz službene evidencije pregledanih prijava proizilazi da se na istu adresu za dostavu glasačkog materijala u Hrvatskoj, Pećina 8, 23211 Vrana Pakoštani, prijavili žalitelji i još 3 lica. Kada se ima u vidu da svih 6 lica nemaju isto prezime, da je za sva lica naznačena ista mail adresa za kontakt, uz činjenicu da uz žalbu nisu dostavljeni dokazi da žalitelj boravi na ovoj adresi, sve ukazuje na mogući organizovani izborni inženjering.

Relevantni zakoni i podzakonski akti ne propisuju broj lica koja mogu biti prijavljena na istoj adresi za dostavu glasačkog materijala. Ova okolnost cijeni se u svakom pojedinom slučaju u svrhu ispunjavanja garantovanih principa izbornog procesa.

Predmetnom odlukom žalitelju nije uskraćeno biračko pravo jer se, shodno odredbi člana 3.16 stav 2 citiranog zakona, nalazi u izvodu iz Centralnog biračkog spiska za glasanje u osnovnoj izornoj jedinici u kojoj ima prebivalište u Bosni i Hercegovini.

S obzirom na navedeno i po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
SUDIJA
Sreto Crnjak**